

Son Gagl: G. A. Derungs daventa l'emprim commember d'onur

L'experiment cun brass-band ed instruments ad artg è reussì

■ (anr/vi) Fitg bunas criticas pon ins leger en la gasettas da Son Gagl e conturn. La pressa lauda la primaudi- zun da la «Serenata bodana» dal cumponist Gion Antoni Derungs.

Sonda targada è l'ovra vegnida sunada per l'emprima giada en in ambient idillic – en il Schlosshof ad Arbon. Cun questa chaschun ha il Collegium Musi-
cum da Son Gagl elegì Derungs sco em-
prim commember d'onur.

Dudesch cumposiziuns per il collegium

Il 1972 ha il cumponist rumantsch scrit l'emprima ovra per il collegium a Son Gagl. En il decurs dals onns èn autres vegnididas vitiers ed oz pon ins dumbrar radund dudesch cumposiziuns che Derungs ha scrit aposte per questa institu-
ziun. «El è l'um cun ils pli gronds merits per noss collegium», di *Mario Schwarz*, il manader e dirigent dal collegium.

Avant la primaudiun ha Schwarz surdà a Derungs la tabla da commember d'onur. Il dirigent ha declerà che Derungs saja in dals impurtants cumponists svizzers da noss temp e che ses renum surpassia era ils cunfins da noss pa-
jais.

Brass-band e violinas

En la «serenata bodana» descriva il

cumponist sias imperssiuns dal Lai da Constanza. El dessegna musicalmain la cuntrada cun ses bajetgs imposants e romantics. En la seconda part daventa la musica pli meditativa. Ella maina l'auditur sin il lai e mussa ad el ils suns da l'aua. La terza part è puspè pli viva. Ed il davos sa rasa la saira sur la cuntrada, il serenezi charsina il lai ed zuglia tut en ina atmosfera misteriosa.

La serenata è scritta per artgists ed in quintet da brass-band. Questa cum-
binaziun è dal tuttafatg nunusitada. Ella ha dentant chattà buna accoglientscha tar il publicum ad Arbon. Lez haja numnadaman discurrì suenter il con-
cert be pli da l'ovra da Derungs, di il di-
rigent. Da las duas autres ovras da Mo-
zart e Grieg, ch'èn era vegnididas pre-
schentadas quella saira, n'hajan ins udì
nagut pli.

Lavur solida

Il «Ostschweizer Tagblatt» scriva questa emna davart la primaudiun: «Al cumponist èsi reussì cun quest'ovra ina cum-
posiziun semper persadenta. El na tschertga betg effects avantgardistics, mabain demonstrescha lavur solida. Il dirigent parta cun l'auditur sias impres-
siuns e carmala el viadora sin il Lai da Constanza.»

